

Perairan Pengerang hingga Sepang lokasi sindiket seludup

Kuala Lumpur: Perairan Pengerang, Johor hingga ke Sepang, Selangor dikesan menjadi lokasi utama sasaran sindiket penyeludupan migran, rokok, arak dan dadah melalui jalan laut bagi mendaratkan muatan haram sebelum diedar ke premis perusahaan di seluruh Semenanjung.

Laluan sepanjang 340 kilometer itu dikesan menjadi tumpuan sindiket berdasarkan faktor geografi yang hampir dengan negara jiran, selain mudah meloloskan diri tanpa dikesan.

Komander Pasukan Marin, Senior Asisten Komisyoner Mohd Yusoff Mat, berkata walaupun lo-

kasi tumpuan mereka dikenal pasti, modus operasinya kerap diubah bagi mengelirukan pihak berkuasa.

Katanya, antara modus operandi sindiket penyeludupan itu ialah menggunakan kapal besar yang berlabuh di tengah laut sebelum muatan diagih kepada bot kecil untuk didaratkan.

"Kita juga mengesan penggunaan litar kamera tertutup (CCTV) diletakkan pada pokok dan laluan sasaran sindiket di sekitar Timur Johor bagi mengesan kehadiran penguat kuasa.

"Selain itu, kawasan pantai timur Sabah teru-

tama di Tawau dikesan menjadi lokasi tumpuan sindiket penyeludupan membabitkan barangan Akta Kawalan Bekalan seperti gas cecair petroleum (LPG) dan minyak subsidi," katanya pada sidang media di sini, semalam.

Memperkenalkan moto 'tiada hari tanpa keberhasilan', Mohd Yusoff berkata, sebanyak 5,645 kes diselesaikan dengan nilai rampasan RM180.71 juta sepanjang setahun beliau menjadi Komander Pasukan Marin.

"Jumlah rampasan meningkat 122 peratus berbanding tempoh sama tahun sebelumnya," katanya.